

Na osnovu člana IV, 4 a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj _____ i na sjednici doma naroda, održanoj _____, usvojila je

**ZAKON O IZMJENAMA I DOPUNAMA ZAKONA
O OSIGURANJU DEPOZITA
U BANKAMA BOSNE I HERCEGOVINE**

Član 1.

U Zakonu o osiguranju depozita u bankama Bosne i Hercegovine ("Službeni glasnik BiH", br. 20/02 i 18/05) u članu 2. "Definicije" stav 9. mijenja se i glasi :

"Osigurani depozit", čija se visina utvrđuje u skladu sa članom 4. zakona, je dio prikladnog depozita koji je pokriven osiguranjem putem Fonda za osiguranje depozita".

Član 2.

U članu 4. stav 1 mijenja se i glasi:

"Najveći iznos osiguranog depozita, zajedno sa obračunatom kamatom, koji isplaćuje Agencija po deponentu po banci članici je prikladan depozit umanjen za zakonski ili ugovoreni dug deponenta prema banci članici najviše 10.000 KM ili koji je manji".

Član 3.

U članu 5. iza tačke 15. dodaje se nova tačka 16. koja glasi :

"- depoziti mikrokreditnih organizacija"

Član 4.

Član 6. mijenja se i glasi:

"Sve banke koje su dobile dozvolu za rad od FBA ili RSAB ili njihovih nasljednika i koje ispunjavaju kriterije Agencije za članstvo navedene u članu 7. dužne su postati banke članice.

Agencija mora utvrditi da banka zadovoljava sve zahtjeve ovog zakona kao i one iz zakona o bankama Federacije Bosne i Hercegovine ili zakona o bankama Republike Srpske, prije izdavanja sertifikata o članstvu toj banci.

Banka, za koju je Agencija utvrdila da je kvalificirana da postane banka članica bit će obavještena o toj činjenici i dužna je podnijeti zahtjev za članstvo kao i informativni obrazac čiji sadržaj je utvrdila Agencija.

Pored dokumenata iz stava 3. ovog člana, banka dostavlja Agenciji primjerak posljednjeg revidiranog finansijskog izvještaja od eksterne revizije obavljenog u skladu s međunarodnim računovodstvenim standardima, ili početni bilans stanja za novoosnovane banke.

Od novoosnovanih banaka zahtjeva se da Agenciji dostave dokaz o njihovoj sposobnosti da ispune kriterije za članstvo u osiguranju depozita za slijedeće tri godine od dana kada je banci izdata dozvola za rad .

Utvrđivanje kvalifikovanosti banke za dobijanje ili zadržavanje certifikata o članstvu ili dozvole za rad razmatrat će se između Agencije i agencija za bankarstvo ili njenih nasljednika prije izdavanja ili oduzimanja certifikata o članstvu ili dozvole za rad.

Konačna odluka o pitanju članstva je isključiva nadležnost Agencije.

Nijedna banka pod prinudnom upravom ili sa privatnim vlasništvom manjim od devedeset procenata ne može aplicirati za učešće u članstvu.

Član 5.

Član 7. mijenja se i glasi:

"Za učestvovanje u osiguranju depozita kao banka članica, osim posjedovanja dozvole za rad izdate od strane nadležne agencije za bankarstvo ili njenih nasljednika i ispunjavanja odredbi ovog Zakona, sve banke članice moraju ispuniti slijedeće kriterije:

- a) kapital;
- b) likvidnost;
- c) kvalitet aktive;
- d) upravljanje;
- e) profitabilnost;
- f) računovodstveni standardi;
- g) rezerve.
- h) tržišni rizik.

Standarde kvaliteta za naprijed navedene kriterije svojom odlukom utvrđuje Upravni odbor Agencije i ista se objavljuje u "Sl glasniku BiH".

Banka može učestvovati u programu osiguranja depozita kao banka članica samo ako je njeno posljednje i sada još uvijek validno rangiranje na kompozitnoj osnovi od strane nadležne agencije za bankarstvo ili njenog nasljednika ocjenjeno "3" ili bolje i bez pojedinačne komponente rangiranja ocjenjene sa "5".

Pored navedenih kriterija banke članice moraju ispuniti i slijedeće uslove:

- a) finansijske i druge zahtjeve ustanovljene Zakonom o bankama;
- b) privatno vlasništvo od najmanje devedeset procenata.

Sve banke članice dužne su zadovoljiti i dalje ispunjavati kriterije sigurnosti i boniteta koje je utvrdila relevantna agencija za bankarstvo.

Agencija će kontinuirano nadgledati poslovanje banaka članica u pogledu ispunjenosti kriterija za članstvo.

Ukoliko banka članica naruši kriterije za članstvo Agencija će prema banci članici preduzeti mjere kako bi se banka članica uskladila sa kriterijima iz ovog zakona.

Upravni odbor Agencije svojom odlukom utvrđuje mjere koje će se poduzeti prema banci članici, ukoliko su narušeni kriteriji iz stava 1. i 3. ovog člana.

Upravni odbor Agencije jednom godišnje razmatra ovaj zakon u vezi sa Zakonom o bankama Federacije Bosne i Hercegovine i Zakonom o bankama Republike Srpske, po pitanju gore navedenih kriterija, kako bi se zadržala usklađenost ovih zakona

Član 6.

Iza člana 7. dodaje se novi član 7.a i glasi:

"Banke su obavezne Agenciji dostavljati izvještaje propisane od nadležnih agencija za bankarstvo ili njenih nasljednika, izvještaje eksterne revizije i izvještaje propisane od same Agencije, u propisanim rokovima.

Za ocjenu kvalificiranosti banke za učešće u programu osiguranja depozita, Agencija će provesti svoju ocjenu dokumenata iz stava 1. ovog člana kao i "on site" posjete banci da potvrdi primljene informacije ili informacije primljene od FAB ili RSAB ili njihovih nasljednika.

Agencija propisuje način vođenja evidencija depozita u bankama članicama radi izvještavanja o relevantnim podacima za Agenciju, što se reguliše ugovorom o članstvu.

Član 7.

U članu 18.4 Zakona dodaje se nova tačka 7. koja glasi:

"donosi Odluku o kriterijima za učešće banaka u programu osiguranja depozita Agencije za osiguranje depozita Bosne i Hercegovine".

Dosadašnja tačka 7. postaje tačka 8 i dalje.»

Član 8.

"U članu 18.4 tačka 18. se briše" .

Član 9.

U članu 19. stav 2. iza tačke m) dodaje se nova tačka n) koja glasi:

"predlaže Upravnom odboru donošenje Odluke o kriterijima za učešće banaka u programu osiguranja depozita kod Agencije za osiguranje depozita Bosne i Hercegovine".

Član 10.

"U članu 22. stav 6. se briše".

Član 11.

U članu 23. dodaje se novi stav 3 koji glasi.

"Centralna banka će na zahtjev Agencije dostavljati izvještaje i informacije sa kojima raspolaže, a koji su Agenciji potrebni radi nadgledanja poslovanja banaka u pogledu ispunjenosti kriterija za članstvo".

Član 12.

U članu 25. stav 2. mijenja se i glasi:

"Prekršajni postupak vodi se u skladu sa Zakonom o prekršajima Bosne i Hercegovine. "

Član 13.

"Član 29. briše se»

Član 14.

"Član 30. briše se"

Član 15.

"Član 31. briše se"

Član 16.

"U članu 32. stav 4 briše se".

"Dosadašnji stavovi 5 i 6 postaju stavovi 4 i 5".

Član 17.

Mijenja se stav 1. člana 33. Zakona i glasi:

"U slučaju statusnih promjena kod banaka članica kao što su spajanje, pripajanje i slično, članstvo u programu osiguranja depozita novonastaloj banci svojom odlukom potvrđuje Upravni odbor Agencije".

Član 18.

U članu 33. stav 1. mijenja se glasi:

"Ovlašćuju se Zakonodavno-pravne komisije Predstavničkog doma i doma naroda Parlamenta Bosne i Hercegovine da utvrde prečišćen tekst ovog Zakona".

Član 19.

Ovaj zakon stupa na snagu osmog dana od dana objavljivanja u "Službenom glasniku BiH".

**PREDSJEDAVAJUĆI
PREDSTAVNIČKOG DOMA
PARLAMENTARNE SKUPŠTINE
BOSNE I HERCEGOVINE**

**PREDSJEDAVAJUĆI
DOMA NARODA
PARLAMENTARNE SKUPŠTINE
BOSNE I HERCEGOVINE**

**OBRAZLOŽENJE ZAKONA O IZMJENAMA I DOPUNAMA
ZAKONA O OSIGURANJU DEPOZITA
U BANKAMA BOSNE I HERCEGOVINE**

I PRAVNI OSNOV ZA DONOŠENJE ZAKONA

Pravni osnov za donošenje predloženog zakona utvrđen je Ustavom Bosne i Hercegovine i to članom IV, 4a kojim je određena nadležnost Parlamentarne skupštine Bosne i Hercegovine za donošenje zakona koji su potrebni za provođenje odluka Predsjedništva ili za vršenje funkcije Skupštine.

Nadležnost Upravnog odbora Agencije kod izmjene zakona utvrđena je članom 18.4 Zakona o osiguranju depozita u bankama Bosne i Hercegovine kojim je ovlašten da donese odluku kojom daje prijedlog Vijeću ministara Bosne i Hercegovine o izmjeni iznosa pokriva osiguranja prikladnih depozita, na inicijativu direktora Agencije.

II OBRAZLOŽENJE PO ČLANOVIMA ZAKONA

Za član 1. i 2.

Zakonom o osiguranju depozita u bankama BiH (« Sl. glasnik BiH » 20/02) određen je iznos osiguranog depozita u visini od KM 5.000,00 da bi Zakonom o izmjeni Zakona o osiguranju depozita u bankama BiH (« Sl. glasnik BiH », br. 18/05) određen iznos od KM 7.500,00.

Fond za osiguranje depozita je u stalnom rastu te se kontinuirano posmatra mogućnost povećanja iznosa osiguranog depozita kao i rizik izloženosti sredstava Fonda u smislu povećanja iznosa osiguranog depozita.

Standard Europske Unije u osiguranju depozita je EUR 20.000,00 a cilj je da se kod ove Agencije u budućnosti postigne taj standard.

Analizama sačinjenim u Agenciji cijeni se realnim da se iznos osiguranog depozita poveća na iznos od 10.000 KM a sa čime su saglasni i donatori USAID i KfW.

Za član 3.

Po svom zakonskom određenju mikrokreditne organizacije se bave plasmanom mikrokredita i prikupljanjem finansijskih i drugih sredstava iz bilo kojeg zakonitog

izvora te se depoziti tih organizacija koje drže u bankama svakako isključuju ali je potrebno to i decidno navesti posebnom tačkom ovog člana radi jasnijeg tumačenja.

Za član 4.

Do sada je pitanje učešća u članstvu bilo regulisano odredbama čl. 6 i 30 Zakona. Kako su se odredbe člana 30. odnosile na prelazni period nakon usvajanja Zakona koji je protekao, na ovaj način pitanje učešća u članstvu se reguliše odredbom čl. 6 dok bi se član 30. brisao.

Za član 5.

Do sada je pitanje kriterija za članstvo u programu osiguranja depozita bilo regulisano odredbama čl. 7 i 31. Zakona. Kako se odredba člana 31. odnosila na prelazni period nakon usvajanja Zakona na ovaj način se pitanje kriterija za članstvo reguliše odredbom čl. 7 dok bi se član 31. brisao.

Za član 6.

Do sada je oblast izvještavanja bila regulisana u odredbama čl. 22 i 30. Zakona i čl. 4 Zakona o izmjenama i dopunama Zakona o osiguranju depozita u bankama Bosne i Hercegovine, te je na ovaj način izvještavanje regulisano jednim članom Zakona.

Za član 7.

Budući da u nadležnostima Upravnog odbora nije bila decidno spomenuta ova važna odluka smatramo da je to potrebno regulisati tačkom 7. člana 18.4.

Za član 8.

Budući da je prekršajni postupak regulisan Zakonom o prekršajima BiH time prestaje potreba postupanja po Pravilniku o prekršajima kao podzakonskim aktom.

Za član 9.

Obrazloženje za čl. 7 odnosi se i na ovaj član jer se decidno predviđa ovlaštenje direktora da Upravnom odboru predlaže donošenje Odluke o kriterijima za učešće banaka u programu osiguranja depozita.

Za član 10.

Ovaj stav Zakona je sada postao stav 4. člana 7a Zakona radi regulisanja oblasti izvještavanja jednom odredbom ga je potrebno brisati iz člana 22. Zakona.

Za član 11.

Postojećom odredbom čl. 23. predviđena je obaveza dostavljanja informacija Centralnoj banci od strane Agencije, a ovim prijedlogom se želi saradnja Centralne banke i Agencije ozvaničiti u oba pravca, imajući u vidu da Centralna banka svakako raspolaže kvalitetnim i pravovremenim informacijama po svim finansijskim pitanjima koja mogu koristiti ovoj Agenciji u obavljanju osnove djelatnosti.

Za član 12.

Donošenjem Zakona o prekršajima BiH prestala je potreba da se postupak reguliše pravilnikom.

Za član 13.

Budući da je odredbom ovog člana bilo regulisano postupanje banaka u prelaznom periodu koji je protekao ova odredba postala je suvišna.

Za član 14.

Učešće u članstvu programa osiguranja depozita sada je regulisano članom, 6. Zakona te se ovaj član ukazuje suvišnim.

Za član 15.

Kriteriji za članstvo u programu osiguranja depozita sada su regulisani članom 7. Zakona te se ovaj član ukazuje suvišnim.

Za član 16.

Budući da je nastupio uslov tj. donesen je Zakon o prekršajima ovaj stav se ukazuje suvišnim.

Za član 17.

U dinamičnom razvoju bankarskog sektora u BiH dešavaju se statusne promjene kao što su spajanje banaka članica ili pripajanje jedne banke članice drugoj potrebno je odlukom Upravnog odbora Agencije potvrditi članstvo takvim bankama.

Za član 18.

Budući da je ovim izmjenama i dopunama izmjenjen i dopunjen veći broj odredbi Zakona potrebno je utvrditi njegov prečišćeni tekst od strane nadležnih tijela Parlamenta Bosne i Hercegovine.

III FINANSIJSKA SREDSTVA

Za provođenje ovog zakona nije potrebno osiguravati sredstva u budžetu Bosne i Hercegovine.